

Preghiere Eucaristiche per le Messe dei fanciulli e della riconciliazione

La Nunziatura Apostolica in Italia, con lettera n. 9339/77 del 23 dicembre 1977, ha inviato la seguente lettera circolare della Sacra Congregazione per i Sacramenti e il Culto Divino ai Presidenti delle Conferenze Episcopali.

SACRA CONGREGATIO PRO SACRAMENTIS ET CULTU DIVINO

Prot. C.D. 2250/77

Romae, die 10 decembris 1977

E.me Domine,

Sacrum hoc Dicasterium exitum consultationis apud nonnullas Conferentias Episcopales peractae circa usum Precum eucharisticarum pro pueris et de reconciliatione, iudicio Summi Pontificis de ipsius mandato sollicite submitit.

Conferentiae Episcopales, quibus facultas iisdem Precibus utendi concessa fuerat, estimationem bonam de usu illarum fere unanimae habuerunt. Quaedam autem inter eas petitionem fecerunt ut usus Precum prorogaretur ultra finem currentis anni 1977, cum breve interiectum tempus fuerit inter initium et finem concessionis; quod quidem multum deminuit facultatem animarum pastoribus datam rationem habendi de efficacitate pastorali ipsius experimenti.

Summus Pontifex vero benigne indulisit ut usus Precum eucharisticarum pro Missis cum pueris et de reconciliatione ad aliud triennium prorogaretur, usque scilicet ad finem anni 1980 eventuri, iisdem, quae antea, servatis condicionibus, sive pro Conferentiis Episcopalibus, quae facultate iam fruuntur, sive pro ceteris Conferentiis, quae Sancta Sede approbante usum Precum in propriam nationem introducere vellent.

Quae dum praescripta Tecum communicare placet, Sacra haec Congregatio opportunum ducit nonnullas condiciones in mentem revocare, ad introductionem atque usum ipsarum Precum omnino necessarias:

1) Usus Precis eucharisticae pro Missis cum pueris limitatur ad Missas, quae pro ipsis tantum celebrantur, aut ad illas in quibus maior pars participantium ab ipsis constituitur (cf. fasciculum cura S. Congregationis pro Cultu Divino editum, cui titulus *Praescripta eucharisticae*

pro Missis cum pueris et de reconciliatione, Romae 1 nov. 1974, p. 2, n. 4).

2) *Preces de reconciliatione* adhiberi possunt quando peculiare celebrationes fiunt super themata de reconciliatione et de paenitentia, praesertim tempore Quadragesimae, occasione peregrinationum vel conventus spiritualis (*ibid.*, p. 2, n. 1).

3) Textus sunt *ad interim* et *ad experimentum*. Proinde publici iuris in editionibus officialibus fieri nequeunt, neque in Missale Romanum sunt inserendi (*ibid.*, p. 2, n. 1).

4) Sanctae Sedis erit, post experimentum, textus definitivos praebere, ita ut in Missale Romanum inserantur.

Interea Conferentiae Episcopales, ope Commissionum de re liturgica, rite institutarum ad normam n. 44 Constitutionis *Sacrosanctum Concilium*, prorsus adlaborent ut subsidia apta apparentur (textus, melodiae praesertim quoad acclamationes), ita ut participatio imprimis puerorum ad celebrationes, quae pro ipsis peraguntur, actiosa atque sapiens evadat, fine earundem celebrationum numquam oblitterato: « Semper prae oculis habendum est tales celebrationes eucharisticas pueros versus Missas adultorum manuducere debere, praesertim eas, ad quas communitas christiana in dominicis convenire debet » (cfr. *Directorium de Missis cum pueris*, n. 21).

Conferentiae Episcopales, quae *Preces eucharisticas pro Missis cum pueris et de reconciliatione* nondum adhibuerunt, quaeque facultatem iisdem utendi Sanctae Sedi petere vellent, notum habeant praedictam concessionem finem habituram esse anno 1980 exeunte.

Omni quo par est obsequio, pergratum mihi est sensus erga Te venerationis meae pandere atque me profiteri

Tibi in Domino add.mum

VERGILIUS NOÈ
a Secretis a.

+ IACOBUS R. CARD. KNOX
Praefectus